



Broj/Број: 03/1-50-1-9-27/08  
Sarajevo/Сарајево, 20.11.2008.godine

## Z A P I S N I K

### 27. sjednice Zajedničke komisije za odbranu i sigurnost BiH Parlamentarne skupštine BiH, održane 20. 11. 2008., u vremenu od 10 do 12 sati

Sjednici su prisustvovali članovi Zajedničke komisije: Branko Zrno, Šefik Džaferović, Slobodan Šaraba, Vinko Zorić, Dušanka Majkić, Jozo Križanović, Mirko Okolić, Ivo Miro Jović i Adem Huskić.

Odsustvo sa sjednice opravdali su: Sulejman Tihić, Hazim Rančić i Drago Kalabić.

Sjednici su prisustvovali i gosti, kao i predstavnici Sekretarijata Parlamentarne skupštine BiH:

- Tarik Sadović, ministar sigurnosti BiH,
- Marina Pendeš, zamjenik ministra odbrane BiH,
- Božica Bojović, Kabinet predsjedavajućeg Vijeća ministara BiH,
- Dragiša Mekić i Midhat Izetbegović, Ministarstvo vanjske trgovine i ekonomskih odnosa BiH,
- Žarko Laketa, Granična policija BiH,
- Mirko Lujić, SIPA,
- Dragan Mektić, Služba za poslove sa strancima,
- Dušan Gavran, BHMAC,
- Lejla Dizdarević i Lejla Hadžihasanović, Glavni štab NATO-a,
- Zoran Brkić, Sektor za odnose s javnošću PSBiH,
- Dragica Hinić, sekretar Zajedničke komisije za odbranu i sigurnost BiH, Željko Grubešić, stručni savjetnik, i Jovica Katić, stručni saradnik.

Sjednicom je predsjedavao **Branko Zrno**, predsjedavajući Zajedničke komisije. Predlažući dnevni red, informirao je prisutne da Šemsudin Mehmedović, čiji je zahtjev trebalo da bude razmatran u okviru 2. tačke dnevnog reda, nije u mogućnosti prisustvovati ovoj sjednici. Zato je predložio da se ova tačka skine s dnevnog reda i razmatra u okviru naredne sjednice, što su članovi Zajedničke komisije jednoglasno prihvatili.

**Slobodan Šaraba** predložio je da se u okviru prve i sada jedine tačke dnevnog reda, ili čak kao posebna tačka, razmatra i aktuelna sigurnosna situacija u BiH. On je konstatirao potrebu da Zajednička komisija, kojoj je inače u nadležnosti da provodi kontrolu rada sigurnosnih institucija, dobije Informaciju o aktuelnoj sigurnosnoj situaciji koja je već dostavljena Predstavničkom domu.

**Branko Zrno** informirao je članove Zajedničke komisije da je na posljednjoj sjednici Predstavničkog doma PSBiH, održanoj dan ranije, razmatrana Informacija o aktuelnom stanju sigurnosti u BiH za 2008. godinu, te da je Dom vratio ovu informaciju podnosicu na dopunu. Predložio je da i Zajednička komisija zatraži tu informaciju, s dopunom koju je zatražio Dom, razmatra je i potom svoje mišljenje u vezi s Informacijom prosljedi u oba doma PSBiH.

Kako nije bilo prijedloga za dodatnom izmjenom i dopunom, konstatirano je da 27. sjednica Zajedničke komisije za odbranu i sigurnost ima sljedeći

## DNEVNI RED

1. Sagledavanje stanja i problema navedenih u Informaciji o stanju sigurnosti za 2007. godinu.

### **Ad. 1. Sagledavanje stanja i problema navedenih u Informaciji o stanju sigurnosti za 2007. godinu**

**Dužanka Majkić** podsjetila je članove Zajedničke komisije na zaključak koji je Dom naroda PSBiH usvojio na 17. sjednici. Tim zaključkom ovaj dom zatražio je od Ministarstva sigurnosti BiH da, u roku od 30 dana, sačini novu informaciju o stanju sigurnosti u Bosni i Hercegovini za 2007. godinu, s analizom stanja sigurnosti i prijedlogom mjera, te da je dostavi na razmatranje Parlamentarnoj skupštini BiH. Zaključila je prema tome da ranije dostavljena informacija još nije usvojena. S obzirom da je ovoj sjednici prisustvuju predstavnici cjelokupnog sigurnosnog sektora, željela bi čuti koji su to problemi s kojima se predstavnici ovog sektora susreću. Navela je da Komisija s Ministarstvom odbrane BiH ima dobru saradnju, ali i naglasila da su vrlo slabi kontakti s predstavnicima Ministarstva sigurnosti BiH, te da joj je nejasno na osnovu čega Ministarstvo sigurnosti BiH pravi svoje planove rada. Istakla je da se vlast nalazi u trećoj godini mandata, a da do danas još nemamo jasno utvrđenu sigurnosnu strategiju, da se ne znaju sigurnosni prioriteti, odnosno šta su prioriteti u radu sigurnosnih agencija. Ona je zamolila da se vrijeme predviđeno za ovu sjednicu kvalitetno iskoristi i da predstavnici sigurnosnih agencija prezentiraju članovima Komisije stvarne probleme s kojima se susreću u svom radu.

**Šefik Džaferović** mišljenja je da ovakva rasprava vodi ka odgađanju ove sjednice. Kako bi se vrijeme racionalno iskoristilo, predložio je da Zajednička komisija bude organizator cjelodnevnog rasprave kojoj bi, osim članova Zajedničke komisije, prisustvovali i predstavnici Ministarstva odbrane BiH, Ministarstva sigurnosti BiH i svih agencija koje djeluju u okviru ovog ministarstva, kao i entitetski i kantonalni ministri unutrašnjih poslova, te načelnici centara javne sigurnosti u cijeloj BiH. Ovakva opširna rasprava, koja treba biti održana u što kraćem roku, vjerovatno bi dovela do konkretnih zaključaka, koje bi Zajednička komisija potom prosljedila domovima PSBiH.

**Branko Zrno** zahvalio se predstavnicima sigurnosnih institucija, s obzirom da se četvrti put odazivaju na poziv Zajedničke komisije o ovoj temi. Istakao je da je sigurnost u cijeloj BiH ugrožena, te da se o ovim problemima treba razgovarati, ali tek nakon dobivanja informacije o aktuelnom stanju sigurnosti. Također je konstatirao da se mora znati hoće li se raspravljati o informaciji o stanju sigurnosti ili pak o sigurnosnoj strategiji. Podržao je potom prijedlog Džaferovića, ali je naglasio da je za organizaciju takvog skupa potrebno najmanje 20 dana, što bi značilo da bi se ova konferencija mogla održati tek u drugoj polovini decembra.

**Jozo Križanović** naveo je da se pred Komisijom nalazi informacija za 2007. godinu, a da je Predstavnički dom na prethodno održanoj sjednici raspravljao o aktuelnoj sigurnosnoj situaciji u BiH. Naveo je da je prilikom razmatranja svake informacije ove vrste istaknuto određeno nezadovoljstvo sigurnosnom situacijom u BiH, njenim uzrocima i posljedicama. Zajednička komisija u svemu tome nastoji obaviti svoju ulogu maksimalno odgovorno. Zato bi volio da se na ovoj sjednici ne razgovara o brojkama i stanju, nego o stvarnim problemima i svemu onome šta nedostaje da bi sigurnosne službe bolje radile i međusobno sarađivale, kao što su npr. nedostatak materijalno-tehničkih sredstava, problemi u međusobnoj saradnji i sl.

**Šefik Džaferović** istakao je da je i rasprava o Informaciji o aktuelnom stanju sigurnosti u BiH na prethodnoj sjednici Predstavničkog doma pokazala, po njegovom sudu, da je ona dobro napravljena. Zaključio je da iz određenih politikantskih razloga nekome ne odgovara trenutno stanje, pa čak i ako je ono zadovoljavajuće. Mišljenja je da stanje nije gore, nego da je, štaviše, mnogo bolje, te zamolio da, kada je stanje sigurnosti u pitanju, svi zajedno pristupaju traženju rješenja, isključujući pri tome politiziranje.

**Dužanka Majkić** replicirala je Šefiku Džaferoviću, rekavši da se ne treba i ne smije politizirati sa sigurnosnom situacijom. Istakla je da treba biti dosljedan, te da će ona, bez obzira na to iz koje

političke stranke dolazi ministar, uvijek govoriti otvoreno i nastojati riješiti sigurnosne probleme koji su evidentni. Upitala je šta je Ministarstvo sigurnosti BiH, koje ima vodeću ulogu na putu evropskih integracija BiH, uradilo na tom planu.. Nedavno se mogla čuti i konstatacija kako za nove policijske strukture nije osiguran budžet za narednu godinu, već da će ona biti osigurana iz sredstava rezerve. Potvrdila je da je istina da se za nove institucije uzimaju sredstva iz budžetske rezerve, ali naglasila da se ona uzimaju za one institucije koje su manjeg kapaciteta od ovih. Svi problemi ove vrste trebalo je da budu razmatrani na budžetskoj radionici, koju je Zajednička komisija organizirala u oktobru, ali je navela da se na toj radionici iz određenih institucija pojavljuju ljudi koji nisu kompetentni. Na kraju diskusije upitala je predstavnike sigurnosnih službi, koji su problemi s kojima se susreću, te na koji način im Zajednička komisija može pomoći u njihovom radu.

**Slobodan Šaraba** saglasio se s konstatacijom da niko nije želio politizirati ovo pitanje, te zaključio da je Komisija, razmatrajući Informaciju o stanju sigurnosti za 2007.godinu, trebalo da razmatra i trenutno stanje u oblasti sigurnosti u BiH.

**Tarik Sadović**, ministar sigurnosti BiH, temu rasprave ocijenio je kao izuzetno široku. Reкао je da se treba fokusirati na tačno određene oblasti, jer se bespotrebno rasipaju resursi, a time se neće doći do onih uputstava koja Zajednička komisija treba dati sigurnosnom sektoru.

Govoreći o odnosu na relaciji Zajednička komisija – Ministarstvo sigurnosti BiH, rekao je da se Ministarstvo uvijek odazivalo pozivima koje mu je upućivala Komisija, te da na sjednice uvijek nastoji poslati kompetentnog predstavnika.

Govoreći o sigurnosnoj strategiji, istakao je postoji dokument „Sigurnosna politika BiH“, koji je donijelo Predsjedništvo BiH 2006. godine.

Govoreći o Informaciji o aktuelnom stanju sigurnosti u BiH u 2008.godini, rekao je da je Ministarstvo uložilo velike napore za njenu izradu, jer je ona kompilacija informacija svih sigurnosnih agencija, te da je glavni razlog zašto ova informacija nije dostavljena Zajedničkoj komisiji kako bi bila razmatrana na ovoj sjednici, jednostavno nedostatak vremena, koji je izazvan prikupljanjem i objedinjavanjem svih ovih informacija, a što je, u najboljem slučaju, do njenog konačnog dolaska u Parlamentarnu skupštinu BiH i stavljanja na dnevni red, oko mjesec dana. Reкао je da je to tehnologija izrade informacije i da je ova informacija dostavljena Parlamentarnoj skupštini BiH u rekordnom roku. U vezi s Informacije o stanju sigurnosti iz 2007. godine, napomenuo je da je ona usvojena u Predstavničkom domu, ali ne i u Domu naroda PSBiH, čiji su zaključci bili povod da sigurnosne agencije u okviru Ministarstva sigurnosti BiH analiziraju onaj dio sigurnosti koji se odnosi na njih, kako bi se konačan izvještaj mogao doraditi.

Naveo je i da je Zajednička komisija zatražila od Ministarstva sigurnosti BiH analizu provođenja Strategije za borbu protiv organiziranog kriminala i korupcije o čemu će biti provedena rasprava na narednoj sjednici Vijeća ministara BiH. Ovim pitanjem bave se sve policijske agencije, kojih u BiH ima 15, te svi sudovi i tužilaštva, što se mora imati u vidu prilikom sačinjavanja ovakvih dokumenata. Definišući organizirani kriminal, kao kriminal u čijoj realizaciji učestvuje tri ili više lica, zaključio je da se radi o veoma širokom pojmu, koji se može manifestirati u svakom krivičnom djelu. Istakao je i da oblast korupcije postoji u svakom segmentu života i rada, ali da Vijeće ministara BiH nije uspjelo postići saglasnost o tome kako treba da izgleda buduća Strategija borbe protiv korupcije i organiziranog kriminala. Govoreći o budžetu novih institucija, naveo je da su u okviru nadležnosti Ministarstva sigurnosti BiH tri nove policijske agencije. Ministarstvo sigurnosti BiH je krajem jula završilo konkursnu proceduru za izbor direktora ovih agencija, ali se Vijeće ministara BiH o tome još nije izjašnjavalo. Teško je napraviti jedinstven budžet za Ministarstvo sigurnosti BiH, jer su sve ove institucije po zakonu samostalne i imaju vlastite projekcije budžeta koje dostavljaju Vijeću ministara BiH. Za novoformirane policijske agencije ne može se očekivati uspješna projekcija budžeta dok god se ne imenuju čelni ljudi ovih agencija i ne napravi njihova unutrašnja organizacija. U prijedlogu budžeta za 2009.godinu Ministarstvo sigurnosti BiH povećalo je svoj budžet za 12 %, a kao posebna stavka predviđena su 4 miliona za osnivanje ovih novih institucija. Ipak, naveo je da je generalni stav Vijeća ministara BiH da se ove godine ide na štedljivi pristup budžetu.

Reкао je da bi volio, ako predstavnici PSBiH nisu zadovoljni dostavljenom informacijom, da se predloži metodologija koja bi bila primjenjivana pri izradi informacija o stanju sigurnosti BiH, a da će on kao ministar to prihvatiti, kao model izvještavanja Parlamentarne skupštine BiH. Ipak,

zamolio je za razumijevanje s obzirom da ova informacija u sebi sadrži izvještaje 15 policijskih agencija iz cijele BiH.

Govoreći o zaključku u kojem se traži da Vijeće ministara BiH što prije dostavi u parlamentarnu proceduru Prijedlog zakona o transportu i osiguranju većih količina novca i vrijednosnih papira, istakao je da je Ministarstvo predložilo Vijeću ministara BiH da se po zahtjevu Zajedničke komisije što prije osnuje radna grupa za izradu navedenog zakona.

Na kraju je zamolio članove Komisije da rasprava rezultira jasnim zaključcima i smjernicama koji će biti usaglašeni s važećim zakonodavstvom u BiH, jer je to vrlo važno za njihovo buduće provođenje.

**Branko Zrno** zahvalio se ministru, te naveo da je Zajednička komisija na svojoj budžetskoj radionici održanoj na Kozari sredinom oktobra, zajedno sa sigurnosnim agencijama, detaljno odradila temu o prijedlozima budžeta za narednu godinu, te zaključio da Komisija ima dobru saradnju sa svim sigurnosnim agencijama u BiH.

**Mirko Lujčić**, direktor SIPA, istakao je da je prvenstveno i došao kako bi upoznao članove Komisije s problemima s kojima se SIPA susreće u svom radu. Potom je naveo da se ova institucija u svom radu susreće s tri problema, a to su: pravni okvir, personal i budžet. Naglasio je da SIPA u prethodne dvije godine nije dobila smjernice za rad od Vijeća ministara BiH. Agencija se nalazi u prilično nezgodnoj budžetskoj situaciji i država mora pravilno usmjeriti rad državnih agencija u skladu s interesima politike. Upitao je kako će jedna državna agencija poput SIPA-e sa 40 % potpunom istražnom komponentom odgovoriti stvarnim zahtjevima koji se pred nju postavljaju.

Govoreći o pravnom okviru, naveo je da su iscrpili sva raspoloživa sredstva, te da su dijelom dobili uslove da izmjenama i dopunama Zakona o SIPA-i budu malo funkcionalniji i racionalniji. Kao jedan od problema naveo je da, u skladu s postojećim Zakonom o policijskim službenicima, po kojem se vrši zapošljavanje policijskih službenika, SIPA od 1.8.2008. ne može zaposliti nikog iz vanjskih agencija. Ovim je blokiran i planirani prijem 20 kadeta ove godine, što je vrlo ozbiljan problem. Drugi aspekt navedenog problema ogleda se u činjenici da je uspostavljen minimalni pravni okvir za dobru saradnju i komunikaciju među agencijama. U praksi, razmjena podataka s drugim agencijama ne funkcioniše, izuzev sa tri institucije, i to sa Službom za poslove sa strancima, OSA-om i Policijom Brčko Distrikta BiH. Zaključio je da SIPA, kao državna agencija koja se bavi istraživanjem najtežih oblika organiziranog kriminala, ne može funkcionirati na takav način.

Govoreći o personalu, naveo je da je u SIPA-i trenutno popunjeno 68,5 % radnih mjesta, što iznosi jedva više od 2/3, te da s tolikim brojem zaposlenih ne može adekvatno funkcionirati. Kao jedan od osnovnih problema, pored navedenih, naveo je budžetski okvir za narednu godinu. Ako ne postoji mogućnost za dodatno zapošljavanje naredne godine, onda sredstva treba preusmjeriti za funkcioniranje esencijalnih djelatnosti SIPA-e. Iscrpljena su sredstva za zapošljavanje i završena konkursna procedura, ali se boji da SIPA ne postane prva agencija koja otpušta svoje radnike kako bi zapošljavala vanjske eksperte. Ako se država opredijelila da jača institucije na državnom nivou, onda neka to i realizira, a čelni ljudi u SIPA-i znat će šta moraju činiti. SIPA se u ovom trenutku susreće s problemom kadrovske popunjenosti i zbog toga što 12 % državnih službenika želi napustiti ovu agenciju. On je zamolio da se ne gubi vrijeme i da se počnu rješavati ključni problemi, jer se dešavaju situacije da kada dođe do ekscesa, kao što je npr. bila nedavna eksplozija bombe u trgovačkom centru FIS u Vitezu, SIPA na raspolaganju ima svega dva istražitelja. Zaključio je da SIPA u ovom smislu funkcionira na granici operativnosti kada su u pitanju istražni kapaciteti, te da ne postoje kriminalističko-obavještajni kapaciteti da adekvatno reaguju u slučaju složenih situacija.

**Branko Zrno** konstatirao je da su ovakve informacije potrebne Zajedničkoj komisiji, kako bi ih ona preusmjerila nadležnim institucijama. Zamolio je i ostale učesnike da kratko iznesu suštinu problema u radu svojih agencija, te napomenuo da će se na planiranoj konferenciji o tome konkretnije razgovarati.

**Dušanika Majkić** sugerirala je Mirku Lujiću da u pisanoj formi dostavi sve ove probleme o kojima je govorio, s čim se on saglasio.

**Šefik Džaferović** izrazio je zabrinutost činjenicom da država uopće nema smjernica za rad SIPA-e, te naveo da se mora tražiti odgovornost za dosadašnji nemar u radu.

**Zarko Laketa**, pomoćnik direktora Granične policije BiH, naveo je da je ova agencija predložila određene izmjene u postojećem Zakonu o graničnoj policiji, kako bi unaprijedili rad službenika koji rade u njoj. Govoreći o problemu granične kontrole, Zakon o graničnoj kontroli BiH, koji je predložilo Vijeće ministara BiH, ocijenio je veoma bitnim za daljnji rad Granične policije, ali prilikom njegove izrade uočeno da određene odredbe nisu u skladu s evropskim principima i praksom. Istakao je odličnu saradnju koju imaju s policijskim agencijama u BiH, u razmjeni kriminalističko-obavještajnih podataka, pa i s policijskim agencijama susjednih zemalja. Rekao je da se Zajednička komisija, prilikom obilaska cijele granice BiH, mogla uvjeriti u sve probleme s kojima se Granična policija BiH susreće, a to se, prije svega, odnosi na probleme u radu s kojima se granični policajci susreću prilikom kontrole putnika i robe. Osnovni problem Granične policije BiH je, kao i SIPA-e, kadrovska nepopunjenost. Iako je u narednoj fiskalnoj godini GPBiH planiran prijem 100 kadeta, osnovni problem bit će njihovo zapošljavanje jer zbog smanjenja budžetskog okvira GPBiH neće imati dovoljno finansijskih sredstava. Stoga je zamolio članove Zajedničke komisije da svojim autoritetom utiču kako bi se ovaj problem riješio. Kao i SIPA, i GPBiH susreće se s problemom odlazak njihovih kadrova u druge agencije. Na kraju, rekao je da GPBiH mora ispoštovati nacionalnu strukturu svojih zaposlenih na graničnim prijelazima u BiH.

**Tarik Sadović** naveo je još da je prilikom planiranja Budžeta za 2009. godinu od ministra finansija i trezora BiH dobio obećanje da neće doći u pitanje finansiranje prijema pomenutih 110 kadeta u Graničnu policiju BiH. U vezi sa Zakonom o graničnoj kontroli, istakao je još da su u njegovoj izradi učestvovali i predstavnici Ministarstva sigurnosti BiH, te da je Zajednička komisija zadužila ovo ministarstvo da, u saradnji s predstavnicima DCAF-a, dođe do prijedloga jedinstvenog teksta Zakona te da je taj sastanak rezultirao usaglašavanjem većeg broja amandmana. Na kraju je još zamolio članove Komisije da uzmu u obzir činjenicu da traženo zapošljavanje službenika u sigurnosnim agencijama prema njihovim sistematizacijama ne podrazumijeva da se ti ljudi zaposle u toj budžetskoj godini, već u narednih nekoliko godina, koliko to budžetski okviri budu dozvoljavali.

**Dušanika Majkić** replicirala je na diskusiju ministra Sadovića u vezi sa Zakonom o graničnoj kontroli BiH. Navela je da je osnovana radna grupa koja je radila na izradi i usaglašavanju ovog zakona, te da je Ministarstvo sigurnosti BiH napravilo prijedlog za izmjenu ovog zakona, što je usvojeno u Vijeću ministara BiH, ali bez saglasnosti predstavnika srpskog naroda, što je izazvalo rasprave na sjednicama domova. Prema njenom mišljenju, postojeći Zakon o graničnoj kontroli bolji je od predloženog, te je zamolila predstavnika Granične policije BiH da o tome da svoje mišljenje. Predstavnik GP saglasio se s navedenom konstatacijom Dušanke Majkić.

**Tarik Sadović** pojasnio je da su se ključne primjedbe odnosile na članove 17. i 42. Prijedloga zakona. Postojeći zakon prepisan je iz Hrvatske gdje je granična policija upravna organizacija sasvim drugačijeg tipa nego što je to slučaj u Bosni i Hercegovini. U izradi novog Prijedloga zakona o graničnoj kontroli učestvovao je stručnjak iz ove oblasti koji dolazi iz Litvanije. Napomenuo je ponovno da je Zajednička komisija zadužila Ministarstvo sigurnosti BiH da, u saradnji s predstavnicima DCAF-a, uradi izmjene tog prijedloga, te da je Ministarstvo to kroz 15 amandmana i uradilo.

**Ivo Miro Jović** uvažio je sve probleme iznesene na ovoj sjednici, ali je mišljenja da se na njoj nešto može riješiti. Svakako je naveo da je ova sjednica vrlo korisna u pripremi cjelodnevnog sastanka, koji bi u formi konferencije, a u organizaciji Zajedničke komisije, trebalo uskoro da bude održan.

**Dragan Mektić**, direktor Službe za poslove sa strancima, naveo je da je ova služba relativno mlada agencija u okviru Ministarstva sigurnosti BiH i da je njena osnovna funkcija provođenje kontrole boravka i kretanja stranaca u BiH, kojih ima oko 10 hiljada u našoj zemlji, te oko nekoliko stotina hiljada stranaca koji prođu kroz BiH, te kontrola zakonitosti njihovog boravka u BiH, odnosno da li ti stranci svoj boravak u BiH koriste u odobrene svrhe. Njihova nastojanja idu u smjeru da se zabrani ulazak nepoželjnih stranaca u BiH još u fazi prije nego što uđu u BiH. U toku prošle godine protjerano je oko hiljadu stranaca iz BiH, a njegova procjena je da će taj broj ove godine biti još i veći. Govoreći o pravnom okviru, naveo je da je Služba došla do jednog kvalitetnog Zakona o

kretanju i boravku stranaca i azilu u BiH koji je skoro u potpunosti usaglašen sa šengenskim pravilima za ulazak, boravak i kretanje stranaca, te da su sada u fazi usaglašavanja većeg broja podzakonskih akata. Zakon o kretanju i boravka stranaca i azilu se, također, treba da bude usaglašen s određenim brojem zakona koji tretiraju ovu materiju na nižim nivoima vlasti u BiH, kao što je npr. zakon o zapošljavanju stranaca, koji se donose na entitetskim nivoima. Pitanje osnivanje firmi od stranih lica, dakle, nije uređeno do kraja u BiH i to je samo jedan od problema s kojima se susreće ova služba u svom radu, a o kojima će svakako više riječi biti na planiranoj konferenciji. Kada je riječ o budžetu, naveo je da je uspostavljen Imigracioni centar u kojem se stranci koji treba da budu protjerani iz BiH stavljaju pod nadzor i ograničava njihovo kretanje, sve dok se ne steknu uslovi za njihovo protjerivanje. Kapacitet ovog centra je 45 lica i on je permanentno maksimalno pun. Naveo je da Evropska komisija u potpunosti finansira izgradnju još jednog objekta smještajnog kapaciteta za još 100 lica, čiji se završetak očekuje krajem iduće godine. Sada se Služba nalazi u situaciji kada joj Evropska komisija nudi novi objekat, ali da ga ona ne može preuzeti jer ne postoje sredstva za zapošljavanje 50 lica koja treba da ga osiguravaju.

**Dušan Gavran**, direktor BH MAC-a, izrazio je zadovoljstvo prisustvom ovoj sjednici, cijeneći da su ovdje tek otvorena neka od bitnih pitanja koja treba da budu riješena. Govoreći o budžetu za narednu godinu, naveo je da, kao i ostalim sigurnosnim agencijama, ni BHMACH-u nisu odobrena tražena sredstva, te da će budžetski okvir biti za 1.200.000 KM manji od njihovog budžetskog zahtjeva, ali je naglasio da će BHMACH svakako funkcionirati i sa ovim sredstvima. U vezi sa osiguravanjem sredstava za deminiranje, naglasio je da su donatori potvrdili da će osigurati obećana sredstva za deminiranje do kraja 2012. godine, te da je do sada osigurano oko 15 miliona dolara za ovu namjenu. Ipak, istakao je kako država ne izdvaja nikakva sredstva za deminiranje, te zamolio nadležne da utiču na to kako bi izdvojila koliko god može za ovu svrhu. On je još govorio o Zakonu o protuminskim akcijama koji im je potreban za njihov dalji rad. Ovaj zakon nalazi se u Ministarstvu civilnih poslova BiH i on je izrazio nadu da će se uskoro naći na sjednici Vijeća ministara BiH, a nakon toga ući i u parlamentarnu proceduru u PSBiH.

Kada je riječ o uništavanju nađenih minsko-eksplozivnih sredstava (MES) i neeksplozivnih ubojitih sredstava (NUS), rekao je da to za sada vrlo uspješno radi civilna zaštita, ali da problemi nastaju kada ovaj posao rade različite kompanije koje ta pronađena sredstva kriju ili ih na poslijetku bacaju na mjesta koja nisu predviđena za to. Naveo je da se oko 20 % nesreća desilo tako što su mine uništavali neobučeni ljudi koje angažiraju takve kompanije. Vezano za uništavanje viška NUS-a, naveo je još da se hitno mora uraditi zakonski okvir koji će amnestirati lica koja vraćaju NUS, jer bez izglasavanja ovakvog zakona redovno će se dešavati situacije da ljudi bacaju MES na razne lokacije. Naglasio je da institucija koja radi na uništavanju NUS-a, lakog naoružanja i kasetnih bombi mora biti pod jednom komandom na državnom nivou. U tom smislu naveo je da očekuje podršku od svih državnih zvaničnika koji se bave ovim pitanjima. Zaključio je da, sistemski gledano, BHMACH može funkcionirati do 2019. godine, te da je on optimista da će BiH u što skorije vrijeme biti očišćena od mina.

**Branko Zrno** predložio je članovima Zajedničke komisije da podrže prijedlog Šefika Džaferovića za organiziranje konferencije o aktuelnom stanju sigurnosti u BiH, te istakao da će Komisija od svake agencije zatražiti kratku pisanu informaciju iz njihove oblasti. Zahvalio se svima na učešću na ovoj sjednici i zaključio da će naredni sastanak ovog tipa biti održan u drugoj polovini decembra na dogovorenoj konferenciji.

Nakon rasprave, članovi Zajedničke komisije jednoglasno su usvojili prijedlog za organiziranje jednodnevne konferencije o aktuelnom stanju sigurnosti u BiH, koja treba da bude održana u decembru tekuće godine.

Zapisnik sačinila  
**Dragica Hinić**

Predsjedavajući  
Zajedničke komisije  
**Branko Zrno**